

Þingsköp Rafiðnaðarsambands Íslands

1. kafli

Upphaf þings – Afgreiðsla kjörbréfa

1. grein

Formaður RSÍ setur þing og stjórnar því þar til þingforseti hefur verið kosinn og skal formaður standa fyrir kosningu hans.

Að lokinni setningu sambandsþings getur formaður heimilað gestum sem miðstjórn hefur boðið til setningar þingsins að taka til máls.

2. grein

Formaður RSÍ skipar þriggja manna kjörbréfanefnd í samræmi við 34. grein laga sambandsins.

Þegar þing hefur verið sett skal kjörbréfanefnd skila tillögum sínum.

Tillögur kjörbréfanefndar skulu liggja frammi og vera þingfulltrúum aðgengilegar í a.m.k. hálf klukkustund áður en þing er sett og þær eru teknar til afgreiðslu.

Framsögumaður kjörbréfanefndar gerir grein fyrir tillögum nefndarinnar um hvort kosning og kjörgengi þingfulltrúa og varafulltrúa þeirra, skuli talin gild, sbr. 5. kafla laga RSÍ.

Formaður ber upp tillögu kjörbréfanefndar munnlega án þess að lesin séu einstök kjörbréf. Þó skal lesa þau kjörbréf sem lagt er til að hafnað verði og þau sem lagt er til að afgreiðslu verði frestað.

3. grein

Einfaldur meirihluti atkvæða ræður við afgreiðslu kjörbréfa. Minnst 10 þingfulltrúar geta skriflega krafist leynilegrar atkvæðagreiðslu um gildi eins eða fleiri kjörbréfa.

4. grein

Þingfulltrúar hafa full réttindi um afgreiðslu eigin kjörbréfa.

5. grein

Þingfulltrúar geta samþykkt frestun á afgreiðslu einstakra kjörbréfa sé þörf nánari athugana á þeim.

Skulu hlutaðeigandi þingfulltrúar engan þátt taka í þingstörfum á meðan athugun fer fram og þar til afgreiðslu þeirra er lokið sbr. þó 4. grein.

6. grein

Kjörbréfanefnd starfar frá því hún er skipuð samkvæmt 34. grein laga sambandsins þar til ný nefnd hefur verið skipuð vegna næsta þings eða aukþings.

7. grein

Nú hamla lögmætar ástæður (s.s. samgöngur eða veikindi) því að kjörbréf berist skrifstofu RSÍ á réttum tíma og skal kjörbréfanefnd þá fjalla um þau strax og við verður komið og þingið síðan afgreiða þau.

8. grein

Eigi þingfulltrúar lögmæt forföll eftir að kjörbréf þeirra hafa verið afgreidd, sem sannanlega gera þeim ókleift að rækja þingstörf, skal kjörbréfanefnd þegar í stað fjalla um kjörbréf varafulltrúa í þeirra stað og þingið síðan afgreiða þau svo fljótt sem við verður komið. Varafulltrúi gegnir að svo búnu þingstörfum til þingloka.

9. grein

Kjörbréf sem þingið hefur ákveðið með atkvæðagreiðslu að taka ekki gild, verða eigi borin upp til atkvæða eða tekin til umræðu aftur á sama þingi.

10. grein

Þegar kjörbréf hafa verið afgreidd skal formaður sambandsins leggja fyrir inntökubeiðnir nýrra félaga. Fyrir skal liggja bráðabirgðaafgreiðsla sambandsstjórnar samkvæmt 5. grein laga RSÍ.

Aðgang að þingsal eiga þingfulltrúar, starfsmenn þings, sérstakir gestir þess og starfslíð fundarhússins.

2. kafli Stjórn sambandsþings

11. grein

Að lokinni afgreiðslu kjörbréfa og inntöku nýrra félaga skal kjósa þingforseta og tvo til vara og mynda þeir stjórn þingsins.

Fyrst skal kjósa þingforseta sem tekur þá við stjórn þingsins af formanni og gengst fyrir kosningu tveggja varaþingforseta og tveggja þingritara.

Rétt kjörinn þingforseti þarf að hljóta meira en helming greiddra atkvæða þeirra sem á fundi eru.

Verði þeim atkvæðafjöldi eigi náð við fyrstu kosningu skal kosið að nýju um þau tvö sem flest atkvæði hlutu í fyrri umferð og ræður hlutkesti ef þau sem til greina koma hafa hlotið jafnmörg atkvæði við fyrri umferð. Verður það þeirra þingforseti sem fleiri atkvæði fær þá. Fáí bæði jafnmörg atkvæði ræður hlutkesti hvort verður þingforseti.

Sömu reglu skal fylgt við kosningu varaþingforseta og þingritara.

Minnst 10 þingfulltrúar geta skriflega krafist leynilegrar atkvæðagreiðslu við kosningu þingforseta.

12. grein

Þingforseti stjórnar þingfundi og sér um að allt fari fram með góðri reglu, tekur við öllum erindum til þingsins og skýrir frá þeim og dreifir til þingfulltrúa.

13. grein

Vilji þingforseti taka þátt í umræðum frekar en þingforsetastaða krefur þá viku hann þingforsetasæti, en varaþingforseti tekur við stjórn þingsins á meðan.

14. grein

Hlutverk þingritara er að halda gerðarbók undir umsjón þingforseta og skal í henni getið allra mála, er rædd eru á þingfundum og úrslita þeirra.

Þingritarar skrá atkvæði við atkvæðagreiðslur og kosningar.

Sömuleiðis sjá þeir með þingforseta um að ályktanir séu skrásettar og áritar þingforseti eitt eintak hverrar ályktunar eða tillögu sem frumheimild.

Þingritarar skipta störfum á milli sín eftir samkomulagi við þingforseta.

15. grein

Þingforseti skipar fólk til að annast dreifingu atkvæðaseðla.

Þingforseti skipar teljara úr hópi þingfulltrúa og/eða starfsmanna svo sem þurfa þykir á hverjum tíma.

3. kafli Nefndir

16. grein

Á þingi sambandsins starfar dagskrárnefnd sem skipuð er formanni og varaformanni sambandsins auk þingforsetum þingsins.

Forfallist formaður eða varaformaður sambandsins tilnefnir miðstjórn fulltrúa úr sínum hópi í dagskrárnefndina.

Dagskrárnefnd undirbýr dagskrá þings sem byggð skal á þeim málum sem lögð eru fyrir þingið skv. lögum RSÍ og gerir tillögur um þær málefnanefndir sem starfa á þinginu. Jafnframt skal hún gera tillögu um hver skuli stjórna störfum hverrar nefndar og um nefndarritara. Þingfulltrúar skrá sig til starfa í einstökum nefndum og fara með atkvæðisrétt í störfum þeirra.

17. grein

Á þingi skal kjósa uppstillinganefnd skipaða 5 fulltrúum, sem starfar þar til kosningu er lokið. Uppstillinganefnd skal leggja fram tillögur um uppstillingu til þeirra starfa sem þingið kys til nema annað sé tekið fram í þingsköpum þessum.

18. grein

Þingið stofnar aðrar nefndir á hvaða stigi máls sem er, gefist tilefni til. Sé það gert áður en umræðum er lokið, skal umræðum frestað.

19. grein

Nefndir skulu skila skriflegum álitum sínum til þingsins og skal þeim dreift til þingfulltrúa.

Sé ekki eining um niðurstöðu nefndar geta þau sem að séráliti standa skipað sér frummælenda sem hefur sama rétt og frummælandi meirihluta við umræður á þingfundum, enda sé séráliti skilað skriflega og það stutt skriflega af ekki færri en 5 þingfulltrúum.

4. kafli Umræður

20. grein

Hver þingfulltrúi sem taka vill til máls skal óska heimildar þingforseta samkvæmt þeim reglum sem hann ákveður.

Ef tveir eða fleiri þingfulltrúar kveða sér hljóðs samtímis ákveður þingforseti í hvaða röð þeir tala.

21. grein

Þingfulltrúi skal ávallt mæla úr ræðustól og jafnan víkja ræðu sinni til þingforseta og þingsins.

22. grein

Formaður sambandsins má taka til máls eins oft í umræðum um skýrslu miðstjórnar og hann óskar. Frummælendur meiri- eða minnihluta nefndar mega taka til máls þrisvar sinnum um málefni það er þeir flytja, að hámarki 10 mín. í senn.

Aðrir þingfulltrúar mega ekki tala oftar en tvisvar við sömu umræðu um sama mál og í 10 mínútur í senn.

Þó er jafnan heimilt að gera stutta athugasemd um atkvæðagreiðslu, þingstjórn eða þingsköp.

Tillöguflytjanda er heimilt að taka til máls í lok umræðu um viðkomandi tillögu, þó ekki lengur en í 5 mínútur. Regla þessi gildir um einn einstakling úr hópi tillöguflytjenda séu tillöguflytjendur fleiri en einn.

23. grein

Ef þingforseti telur umræðu dragast úr hófi fram getur hann lagt til að ræðutími frummælanda meiri- eða minnihluta nefndar verði eigi lengri en 5 mínútur.

Þá getur þingforseti hvenær sem er lagt til að umræðum skuli lokið á ákveðnum tíma. Þingið afgreiðir tillögur þingforseta í þessu efni umræðulaust.

Þingfulltrúar geta borið fram slíka tillögu enda sé hún skriflega studd með undirritun ekki færri en 10 þingfulltrúa. Skal tillagan afgreidd umræðulaust.

24. grein

Skylt er þingfulltrúum að lúta valdi þingforseta í hvívetna er að því lýtur að gætt sé góðrar reglu. Láti þingfulltrúar sem vikið hafa frá góðri reglu eigi segjast skal þingforseti víta þá og nefna til ástæður. Ef þingfulltrúi er víttur tvisvar á sama þingfundi getur þingforseti lagt til við þingið að hann verði sviptur málfrelsi það sem eftir lifir þingfundar. Skal sú tillaga afgreidd umræðulaust.

5. kafli

Tillögur, lagabreytingar og atkvæðagreiðsla

25. grein

Engar tillögur um mál á þingi er hægt að bera upp til atkvæða nema þeim hafi verið dreift skriflega og/eða rafrænt til þingfulltrúa. Í öllum málum samkvæmt kafla þessum

ræður einfaldur meirihluti atkvæða nema lög RSÍ eða þingsköp þessi mæli fyrir á annan veg.

26. grein

Um þau mál sem berast sambandsþingi skv. lögum RSÍ skulu fara fram tvær umræður. Við fyrri umræðu skal gera grein fyrir tillögum og leggja fram og gera grein fyrir tillögum til breytinga á þeim ef einhverjar eru. Að svo búnu skal öllum tillögum vísað til viðeigandi málefnanefndar.

27. grein

Drög að ályktun eða tillaga sem málefnanefnd á þingi sendir frá sér til síðari umræðu telst ekki breytingartillaga heldur aðaltillaga og samhliða teljast allar tillögur úr fyrri umræðu niður fallnar.

Við síðari umræðu er þingfulltrúum heimilt að flytja breytingatillögur við drög að ályktun eða tillögu málefnanefndar.

Við síðari umræðu skal þingforseti bera tillögur upp í þeirri röð sem hann ákveður.

Séu fleiri en ein tillaga í sama máli skal þó fyrst bera upp þá tillögu sem lengst gengur.

28. grein

Undir liðnum önnur mál er þingfulltrúum heimilt að taka upp hvert það mál sem þeir óska eftir umræðu um, önnur en þau sem þegar hafa hlotið afgreiðslu þingsins. Ekki er þeim þó undir þessum lið heimilt að bera fram tillögur til ályktunar um annað en að fela miðstjórn og/eða formanni RSÍ að vinna að tilteknum verkefnum eða málefnum milli þinga.

29. grein

Allar tillögur sem bornar eru fram skulu vera skriflegar, undirritaðar af tillöguflytjendum og skriflega studdar af ekki færri en 5 þingfulltrúum að tillöguflytjendum meðtöldum.

Ekki er heimilt að taka tillögu til umræðu fyrr en þingforseti hefur lýst henni. Komi upp ágreiningur um í hvaða nefnd ákveðin tillaga skuli rædd skal þingforseti leysa úr þeim ágreiningi með úrskurði.

30. grein

Séu fleiri en einn flytjandi að tillögu getur hver og einn þeirra dregið sig til baka af tillögunni í heyranda hljóði.

Fari svo að tillaga sé í heild sinni dregin til baka, getur hver sem er úr hópi þingfulltrúa gert slíka tillögu að sinni í heyranda hljóði á sama þingfundi og undirritað hana síðan til staðfestingar, enda sé aflað stuðnings 5 þingfulltrúa við hana að nýju.

Ákvæði þessarar greinar gilda ekki um tillögur þær sem tilskilinn stuðning þarf skv. þingsköpum þessum.

31. grein

Efnislegar tillögur eru þessar:

- 1) Aðaltillaga.
- 2) Breytingartillaga.
- 3) Viðaukatillaga.

32. grein

Við atkvæðagreiðslu skal fyrst bera upp breytingartillögu við aðaltillögu. Síðan skal bera upp aðaltillögu með áorðnum breytingum hafi breytingartillögur verið samþykktar.

Að öðrum kosti er aðaltillaga borin upp í upphaflegri mynd.

Þá skal bera upp viðaukatillögur.

33. grein

Þær breytingartillögur sem lengra ganga skal bera upp á undan þeim sem ganga skemur.

Breytingartillögu sem kollvarpar eða breytir aðaltilgangi annarrar tillögu eða sem varðar önnur efnisatriði en tillaga hefur verið gerð um breytingu á, má þingforseti ekki taka til greina en því álitinu sínu skal þingforseti lýsa fyrir fundi.

Til að breytingatillaga nái fram að ganga þarf hún að hljóta sama fjölda atkvæða eins og aðaltillagan þarf til þess að teljast samþykkt.

34. grein

Forgangstillögur eru í þessari röð:

- 1) Tillaga um að ganga þegar til atkvæða.
- 2) Tillaga um að vísa máli frá.
- 3) Tillaga um að taka fyrir næsta mál á dagskrá.
- 4) Tillaga um að fresta máli.
- 5) Tillaga um að vísa máli til annars valds.

Tillögur undir 1. tölulið má ekki ræða.

Um tillögur undir 2., 3. og 4. töluliðum. má gera stuttar athugasemdir.

Um tillögur undir 5. tölulið. má gera stuttar athugasemdir en um málið sjálft gilda sömu reglur og um önnur efnisleg mál sem koma fyrir þingið.

35. grein

Þingforseta er heimilt að bera tillögu upp í tveimur eða fleiri liðum en þó því aðeins að hver liður sé sjálfstæður og að skiptingin geri tillöguna ekki óljósa.

36. grein

Tillögu, sem hefur verið felld, má ekki bera upp á sama þingfundi.

Með samþykki minnst 2/3 hluta atkvæða þingfulltrúa má þó taka málið upp á ný síðar á þinginu enda séu 3/4 hlutar þingfulltrúa, þeirra sem eigi hafa boðað forföll til þingforseta, viðstaddir á þingfundi þegar slík tillaga er til afgreiðslu.

Ákvæði þessarar greinar eiga ekki við um afgreiðslu kjörbréfa.

37. grein

Atkvæðagreiðsla um tillögur fer fram með handauppréttingu.

Leynileg atkvæðagreiðsla fer fram ef þess er óskað skriflega og tillagan skriflega studd af minnst 10 þingfulltrúum.

Atkvæðagreiðslur við nafnakall eru ekki heimilar.

Heimilt er að viðhafa atkvæðagreiðslur með rafrænum hætti. Atkvæðaseðlar eru þá vistaðir á tölvu og atkvæði greidd með þar til gerðum búnaði. Meginreglur þingskapa þessara gilda um atkvæðagreiðsluna eftir því sem við á.

38. grein

Engar atkvæðagreiðslur geta farið fram um tillögur nema á fundi sé staddur minnst helmingur þingfulltrúa sem ekki hafa boðað forföll sín til þingforseta sbr. þó grein 36.

Þrátt fyrir ákvæði 1. mgr. er atkvæðagreiðslan lögmæt með þeim þingfulltrúum sem mættir eru til þingfundar, hafi þingforseti tiltekið og tilkynnt sérstakan tíma fyrir viðkomandi atkvæðagreiðslu með að a.m.k. 30 mínútna fyrirvara.

39. grein

Þingforseti skipar teljara til talningar atkvæða úr hópi þingfulltrúa og/eða starfsmanna, svo marga sem henta þykir.

Jafnan skulu teljarar úr hópi þingfulltrúa, allt eftir því sem við á, vera skipaðir úr hópum andstæðra fylkinga á þingfundum.

40. grein

Breyting á lögum RSÍ telst ekki samþykkt nema hún hljóti 2/3 atkvæða á fundi.

6.kafli Kosningar

41. grein

Kosningar í trúnaðarstöður skulu vera leynilegar á þingum RSÍ.

Heimilt er að viðhafa kosningar með rafrænum hætti. Kjörseðlar eru þá vistaðir á tölvu og atkvæði greidd með þar til gerðum búnaði. Meginreglur þingskapa þessara gilda um rafrænar kosningar eftir því sem við á.

42. grein

Í öllum málum ræður einfaldur meirihluti, þó með eftirfarandi undantekningum:

- a) A.m.k. helming greiddra atkvæða þarf til þess að ná löglegu kjöri í miðstjórn og sambandsstjórn.
- b) Ákvæði um kjör þingforseta, sbr. grein 11.

43. grein

Komi ekki fram tillögur um fleiri en kjósa skal, skulu þau sjálfkjörin.

44. grein

Þegar meirihluta greiddra atkvæða er krafist vegna kosninga í trúnaðarstöður og það atkvæðamagn fæst ekki í fyrstu umferð, skal kosið að nýju um þau sem ekki náðu kosningu.

Verði kosningu þá heldur ekki lokið, skal kjósa um þau sem flest atkvæði fengu en ekki náðu kosningu í annarri umferð, þannig að tvö séu í kjöri um hvert sæti.

Ef tvö eða fleiri fá jafnmörg atkvæði, ræður hlutkesti úrslitum.

45. grein

Kjörseðill er ógildur, ef á honum eru nöfn einstaklinga, sem ekki eru í kjöri, eða ef ekki eru greidd atkvæði jafnmörgum og kjósa á. Auður seðill telst ekki til greiddra atkvæða en gefa skal upp fjölda auðra seðla og ógildra þegar kosningu er lýst.

Sé viðhöfð rafræn atkvæðagreiðsla er heimilt að gera ráð fyrir því að viðeigandi tölvubúnaður sé þannig úr garði gerður að ekki sé hægt að gera kjörseðil ógildan.

46. grein

Við atkvæðagreiðslu fer hver þingfulltrúi með atkvæði í samræmi við lög RSÍ.

47. grein

Þingforseti skal gera þingfulltrúum viðvart með tilkynningu áður en kosningar hefjast. Eftir hæfilegan umþóttunartíma, tilkynnir þingforseti að dreifing kjörseðla hefjist og um leið ber starfsmönnum að sjá til þess að enginn gangi út eða inn í fundarsalinn þar til þingforseti hefur lýst yfir að kosningu sé lokið, kjörseðlum safnað saman og athugasemdir ekki komið fram um það.

Fari kosningar fram með rafrænum hætti skal þingforseti með sama hætti tilkynna að nú muni kosningar hefjast og gefa upp þann tíma sem áætlað er að kosning muni taka. Að svo búnu skal aðgangur að rafrænum kosningabúnaði opnaður og kosningar hefjast. Kosning skal að minnsta kosti standa jafnlengi og þingforseti hefur áætlað. 10 mínútum áður en kosningu líkur samkvæmt ákvörðun þingforseta skal tilkynna fundinum þá ákvörðun. Að liðnum þeim fresti skal aðgangi að rafrænum kosningabúnaði lokað og lýsir þá þingforseti að kosningu sé lokið.

48. grein

Um leið og talningu kjörseðla við hverja kosningu er lokið og niðurstaða talningar færð á skýrslu til þingforseta sem allir talningamenn hafa staðfest sem rétta, skulu kjörseðlar innsiglaðir í traustan kassa eða varðveittir í lokuðum gagnagrunni hafi kosning verið rafræn og geymast þar til þingforseti hefur tilkynnt þingfulltrúum úrslit.

Komi ekki fram skrifleg krafa minnst 10 þingfulltrúa um endurtalningu atkvæða þegar eftir tilkynningu þingforseta, verður krafa um endurtalningu ekki tekin til greina.

Fyrir lok þingsins skulu kjörseðlar eyðilagðir eða tölvugögnum eytt undir umsjón þingforseta.

49. grein

Kjörgengir í trúnaðarstöður RSÍ eru allir fullgildir félagar í aðildarfélögum RSÍ. Tilnefningar skulu vera skriflegar og studdar með undirritun a.m.k. 5 þingfulltrúa. Skriflegar stuðningsyfirlýsingar þurfa þó ekki að fylgja tillögum kjörnefndar.

Sé á þingi stungið upp á fólki í trúnaðarstöður sem eigi situr fundinn, verða slíkar tilnefningar eigi teknar til greina nema fyrir liggi staðfest yfirlýsing um að viðkomandi taki kjöri.

7. kafli

Afgreiðsla og breyting fundarskapa

50. grein

Einfaldur meirihluti greiddra atkvæða ræður um afgreiðslu þingskapa.

51. grein

Komi fram tillögur um þingstjórn eða meðferð mála sem þessi þingsköp ná ekki til, þá ræður einfaldur meirihluti enda sé þingfundur löglegur.

Þannig samþykkt á 17. þingi Rafiðnaðarsambands Íslands 28., 29. og 30. apríl 2011.